

四庫全書

子部

欽定四庫全書

子部

經濟類編卷三十一

詳校官中書臣瞿 煦

主事臣祁韻士覆勘

總校官知縣臣繆 琪

校對官中書臣王家賓

謄錄監生臣王遇亨

欽定四庫全書

經濟類編卷三十一

明 馮琦馮瑗 撰

銓衡類三

求賢

二十七則

寶賢附

亢倉子賢道篇 賢良所以屢求而不至難進而易退者非為愛身而不死王事適恐盡忠而主莫之信耳自知有材識之人外恭謹而內無息其於衆也蘇正而不

狎親之則彌莊疎之則退去而不怨窮厄剝以命自寬
榮達則以道自止人有眎其儀賢也聒其聲賢也徵神
課識或負所望夫賢人其見用也入則諷譽出則龔默
職司勤辨居室儉閒其未見用也藏身於衆藏識於目
藏言於口飽食安步獨善其身貞而不怨智者不疑事
識者不疑人有識之士行危而色不可疎言遜而理不
可拔凡謂賢人不自稱賢效在官功在事事太平之時
上士運其識中士竭其耐小人輸其力齊有培子者材

可以振國行可以獨立事父母孝謹鄉黨恭循念居貧
無以為養施信義而遊者久之矣所如寡合或為棄昔
夸毗者所蚩給於是負杖步足問乎亢倉子曰吾聞至
人忘情黎人不事情存情之曹務其教訓而尊信義吾
乃不知為工受不信為信信而不見信為信為勤慕義
為義然則信義之士常獨厄隨退胡以取貴虐昔而教
理之所上也亢倉子俯而循衽仰而譔超然歌曰時之
陽兮信義昌時之默兮信義伏陽與默昌與伏汨吾無

誰私兮羌忽不知其讀夫運正性以如適而物莫之應者真不行也真且不行謂之道喪道喪之時上士乃隱隱之為義有可為也莫可為者也有可用也莫可用者也祭公問賢材何從而致之亢倉子曰賢正可待不可求材慎在求不慎無若天子靜大臣明刑不避賢澤不隔下則賢人自至而求用矣賢人用則四海之內明目而眎清耳而聽坦心而無鬱矣天自成地自寧萬物醇化鬼神不能竊故曰賢正可待不可求若天子勤明大

臣蘇理之求士也則恢弘方大公直靖人之材至若天子苛察大臣躁急之求士也則曲心巧應毀方破道之材至若天子疑忌大臣巧隨之求士也則奇姓異名仄媚怪術之材至若天子自賢大臣固位之求士也則事文逐譽貪濁浮麗之材至若天子依違大臣回佞之求士也則外忠內僻情毒言蘇之才至故曰才慎在求不慎無昔者黃帝得常僊封鴻臚容邱商王得伊尹中興得甫申齊桓得甯籍皆由數君體道邁仁布昭聖武思

輯光明寬厚昌正而衆賢求用非為簡核而得也祭公
曰夫子云賢人不求而自至亦有非賢不求而自至者
庠亢倉子曰夫非賢不求而自至者固衆矣夫天下有
道則賢人不求而自至天下無道則非賢不求而自至
人主有道者寡無道者衆天下賢人少不肖者多是知
非賢不求而自至者多矣祭公曰賢固濟天下材亦能
濟天下俱濟天下賢與材安取異邪亢倉子曰寤虛哉
其問也功成事畢不徇封譽恭退樸儉之謂賢功成事

畢榮在祿譽光揚志滿之謂材賢可以鎮國材亦可以
理國所謂鎮者蘇寧無為人不知其力所謂理者勤率
其事人知所於德一賢統衆材則有餘衆材度一賢猶
不足如是賢材之殊域有居山林而諠者有在人俗而
靜者有諠而正者有靜而邪者凡眎察其貌鄙俗而能
有賢者萬不一眎察其貌端雅而實小人者十而九夫
不練其言而知其文不責其儀而審其度不采其譽而
知其善不流其毀而斷其實可謂有識者也

墨子尚賢篇 子墨子言曰古者王公大人為政於國
家者皆欲國家之富人民之衆刑政之治然而不得富
而得貧不得衆而得寡不得治而得亂則是本失其所
欲得其所惡是其故何也子墨子言曰是在王公大人
為政於國家者不能以尚賢事能為政也是故國有賢
良之士衆則國家之治厚賢良之士寡則國家之治薄
故大人之務將在於衆賢而已曰然則衆賢之術將柰
何哉子墨子言曰譬若欲衆其國之善射御之士者必

將富之貴之敬之譽之然後國之善射御之士將可得而衆也况又有賢良之士厚乎德行辯乎言談博乎道術者乎此固國家之珍而社稷之佐也亦必且富之貴之敬之譽之然後國之良士亦將可得而衆也是故古者聖王之為政言曰不義不富不義不貴不義不親不義不近是以國之富貴人聞之皆退而謀曰始我所恃者富貴也今上舉義不辟貧賤然則我不可不為義親者聞之亦退而謀曰始我所恃者親也今上舉義不辟

親疎然則我不可不為義近者聞之亦退而謀曰始我所恃者近也今上舉義不避近然則我不可不為義遠者聞之亦退而謀曰我始以遠為無恃今上舉義不辟遠然則我不可不為義遠至遠鄙郊外之臣門庭庶子國中之衆四鄙之萌人聞之皆競為義是其故何也曰上之所以使下者一物也下之所以事上者一術也譬之異者有高牆深宮牆立既謹上為鑿一門有盜人入闖其自入而求之盜其無自出是其故何也則上得要

也故古者聖王之為政列德而尚賢雖在農與工肆之人有能則舉之高予之爵重予之祿任之以事斷予之令曰爵位不高則民弗敬蓄祿不厚則民不信政令不斷則民不畏舉三者授之賢者非為賢賜也欲其事之成故當是時以德就列以官服事以勞殿賞量功而分祿故官無常貴而民無終賤有能則舉之無能則下之舉公義辟私怨此若言之謂也故古者堯舉舜於服澤之陽授之政天下平禹舉益於陰方之中授之政九州

成湯舉伊尹於庖廚之中授之政其謀得文王舉閔天
泰顛於置罔之中授之政西土服故當是時雖在於厚
祿尊位之臣莫不敬懼而施雖在農與工肆之人莫不
競勸而尚意故士者所以為輔相承嗣也故得士則謀
不困體不勞名立而功業彰而惡不生則由得士也是
故子墨子言曰得意賢士不可不舉不得意賢士不可
不舉尚欲祖述堯舜禹湯之道將不可不以尚賢夫尚
賢者政之本也何以知尚賢之為政本也曰自貴且

智者為政乎愚且賤者則治自愚且賤者為政乎貴且智者則亂是以知尚賢之為政本也故古者聖王甚尊尚賢而任使能不黨父兄不偏貴富不嬖顏色賢者舉而上之富而貴之以為官長不肖者抑而廢之貧而賤之以為徒役是以民皆勸其賞畏其罰相率而為賢者以賢者衆而不肖者寡此謂進賢然後聖人聽其言述其行察其所能而慎予官此謂事能故可使治國者使治國可使長官者使長官可使治邑者使治邑凡所使

治國家官府邑里此皆國之賢者也賢者之治國家也
蚤朝晏退聽獄治政是以國家治而刑法正賢者之長
官也夜寢夙興收斂關市山林澤梁之利以實官府是
以官府實而財不散賢者之治邑也蚤出莫入耕稼樹
藝聚菽粟是以菽粟多而民足乎食故國家治則刑法
正官府實則萬民富 貪於政者不能分人以事厚於
貨者不能分人以祿事則不與祿則不分請問天下之
賢人將何自至于王公大人之側哉若苟賢者不至乎

王公大人之側則此不肖者在左右也不肖者在左右則其所舉不當賢而所罰不當暴王公大人尊此以為政乎國家則賞亦必不當賢而罰亦必不當暴若苟賞不當賢而罰不當暴則是為賢者不勸而為暴者不沮矣 今天下之士君子處居言語皆尚賢逮至其臨衆發政而治民莫知尚賢而使能我以此知天下之士君子明小而不明於大也何以知其然乎今王公大人有一牛羊之財不能殺必索良宰有一衣裳之財不能制

必索良工當王公大人之於此也雖有骨肉之親無故
富貴面目美好者實知其不能也不使之也是何故恐
其敗財也當王公大人之於此也則不失尚賢而使能
王公大人有一罷馬不能治必索良醫有一危弓不能
張必索良工當王公大人之於此也雖有骨肉之親無
故富貴面目美好者實知其不能也必不使是何故恐
其敗財也當王公大人之於此也則不失尚賢而使能
逮至其國家則不然王公大人骨肉之親無故富貴面

目美好者則舉之則王公大人之親其國家也不若其親一危弓罷馬衣裳牛羊之財與我以此知天下之士君子皆明於小而不明於大也此譬猶瘖者而使為行人聾者而使為樂師是故古之聖王之治天下也其所富其所貴未必王公大人骨肉之親無故富貴面目美好者也是故昔者舜耕於歷山陶於河瀕漁於雷澤灰於常陽堯得之服澤之陽立為天子使接天下之政而治天下之民昔伊尹為莘氏女師僕使為庖人湯得而

舉之立為三公使接天下之政治天下之民昔者傳說居北海之洲園土之上衣褐帶索庸築於傅巖之城武丁得而舉之立為三公使之接天下之政而治天下之民是故昔者堯之舉舜也湯之舉伊尹也武丁之舉傅說也豈以為骨肉之親無故富貴面目美好者哉唯法其言用其謀行其道上可而利天中可而利鬼下可而利人是故推而上之

呂覽觀世篇 千里而有一士比肩也累世而有一聖

人繼踵也士與聖人之所自來若此其難也而治必待
之治奚由至雖幸而有未必知也不知則與無賢同此
治世之所以短而亂世之所以長也故王者不四霸者
不六亡國相望囚主相及得士則無此之患此周之所
封四百餘服國八百餘今無存者矣雖存皆嘗亡矣賢
主知其若此也故日慎一日以終其世譬之若登山登
山者處已高矣左右視尚巍巍焉山在其上賢者之所
與處有似於此身已賢矣行已高矣左右視尚盡賢於

已故周公旦曰吾不如者吾不與處累我者也與我齊者吾不與處無益我者也惟賢者必與賢於已者處賢者之可得與處也禮之也主賢世治則賢者在上主不肖世亂則賢者在下今周室旣滅天下旣廢亂莫大於無天子無天子則彊者勝弱衆者暴寡以兵相剗不得休息而佞進今之世當之矣故欲求有道之士則於江海之上山谷之中僻遠幽閒之所若此則幸於得之矣

劉向尊賢篇 人君之欲平治天下而垂榮名者必尊

賢而下士易曰自上下下其道大光又曰以貴下賤大得民也夫明王之施德而下下也將懷遠而致近也夫朝無賢人猶鴻鵠之無羽翼也雖有千里之望猶不能致其意之所欲至矣是故游江海者託於船致遠道者託於乘欲伯王者託於賢伊尹呂尚管夷吾百里奚此伯王之船乘也釋父兄與子孫非疏之也任庖人鈞屠與仇讎僕虜非阿之也持社稷立功名之道不得不如此也猶大匠之為宮室也量小大而知材木矣比功校

而知人數矣是故呂尚聘而天下知商將亡而周之王也管夷吾百里奚任而天下知齊秦之必伯也豈特船乘哉夫成王伯固有人亡國破家亦固有人桀用干莘紂用惡來宋用商鞅齊用蘇秦秦用趙高而天下知其亡也非其人而欲有功譬其若夏至之日而欲夜之長也射魚指天而欲發之當也雖舜禹猶亦困而又况乎俗主哉 春秋之時天子微弱諸侯力政皆叛不朝衆暴寡強劫弱南夷與北狄交侵中國之不絕若綫桓公

於是用管仲鮑叔隰朋賓胥無甯戚三存亡國一繼絕
世救中國攘夷狄卒脅荆蠻以尊周室霸諸侯晉文公
用咎犯先軫陽處父強中國敗強楚合諸侯朝天子以
顯周室楚莊王用孫叔敖司馬子反將軍子重征陳從
鄭敗強晉無敵於天下秦穆公用百里子蹇叔子王子
廖及由余據有雍州攘敗西戎吳用延州萊季子并冀
州揚威于雞父鄭僖公富有千乘之國貴為諸侯治義不
順人心而取弒於臣者不先得賢也至簡公用子產裨

謹世叔行人子羽賊臣除正臣進去強楚合中國國家
安寧二十餘年無強楚之患故虞有宮之奇晉獻公為
之終夜不寐楚有子玉得臣文公為之側席而坐遠乎
賢者之厭難折衝也夫宋襄公不用公子目夷之言大
辱于楚曹不用僖負羈之諫敗死於戎故共惟五始之
要治亂之端在乎審已而任賢也國家之任賢而吉任
不肖而凶按往世而視已事其必然也如合符此為人
君者不可以不慎也國家昏亂而良臣見魯國大亂季

友之賢見僖公即位而任季子魯國安寧外內無憂行
政二十一年季子之卒後邾擊其南齊伐其北魯不勝
其患將乞師於楚以取全耳故傳曰患之起必自此始
也公子買不可使戍衛公子遂不聽君命而擅之晉內
侵于臣下外困于兵亂弱之患也僖公之性非前二十
一年常賢而後乃漸變為不肖也此季子存之所益亡
之所損也夫得賢失賢其損益之驗如此而人主忽於
所用甚可疾痛也夫智不足以見賢無可柰何矣若智

能見之而強不能決猶豫不用而大者死亡小者亂傾此甚可悲哀也以宋殤公不知孔父之賢乎安知孔父死已必死趨而救之趨而救之者是其賢也以魯莊公不知季子之賢乎安知疾將死召季子而授之國政授之國政者是其賢也此二君知能見賢而皆不能用故宋殤公以殺死魯莊公以賊嗣使宋殤蚤任孔父魯莊素用季子乃將靖鄰國而况自存乎

文王伐崇至鳳黃墟鞮係解因自結太公望曰何為也

王曰君與處上皆其師中皆其友下盡其使也今皆先君之臣故無可使也

齊桓公問於甯戚曰莞子今年老矣為棄寡人而就世也吾恐法令不行人多失職百姓疾怨國多盜賊吾何如而使姦邪不起民衣食足乎甯戚對曰要在得賢而任之桓公曰得賢柰何甯戚對曰開其道路察而用之尊其位重其祿顯其名則天下之士騷然舉足而至矣桓公曰既以舉賢士而用之矣微夫子幸而臨之則未

有布衣屈竒之士踵門而求見寡人者甯戚對曰是君
察之不明舉之不顯而用之疑官之卑祿之薄也且夫
國之所以不得士者有五阻焉主不好士諂諛在旁一
阻也言使事者未嘗見用二阻也壅塞掩蔽必因近習
然後見察三阻也訊獄詰寤其辭以法過之四阻也執
事適欲擅國權命五阻也去此五阻則豪俊並興賢智
求處五阻不去則上蔽吏民之情下塞賢士之路是故
明王聖主之治若夫江海無不受故長為百川之主明

主聖君無不容故安樂而長久因此觀之則安主利人者非獨一士也桓公曰善吾將著夫五阻以為戒本也桓公見小臣稷一日三至不得見也從者曰萬乘之主布衣之士一日三至而不得見亦可以止矣桓公曰不然士之傲爵祿者固輕其主其主傲霸王者亦輕其士縱夫子傲爵祿吾庸敢傲霸王乎五往而後得見天下聞之皆曰桓公猶下布衣之士而况國君乎於是相率而朝靡有不至桓公所以九合諸侯一匡天下者遇士

于是也詩云有覺德行四國順之桓公其以之矣

楚莊王既服鄭伯敗晉師將軍子重三言而不當莊王歸過申侯之邑申侯進飯日中而王不食申侯請罪莊王喟然嘆曰吾聞之其君賢者也而又有師者王其君中君也而又有師者霸其君下君也而羣臣又莫若君者亡今我下君也而羣臣又莫若不穀不穀恐亡且世不絕聖國不絕賢天下有賢而我獨不得若吾生者何以食為故戰服大國義從諸侯戚然憂恐聖知不在乎

身自惜不肖思得賢佐日中忘飯可謂明君矣

魏文侯過段干木之閭而軾其僕曰君何為軾曰此非
段干木之閭乎段干木蓋賢者也吾安敢不軾且吾聞
段干木嘗肯以已易寡人也吾安敢高之段干木光乎
德寡人光乎地段干木富乎義寡人富乎財地不如德
財不如義寡人當事之者也遂致祿百萬而時往問之
國人皆喜相與誦之曰吾君好正段干木之敬吾君好
忠段干木之隆居無幾何秦興兵欲攻魏司馬唐且諫

秦君曰段干木賢者也而魏禮之天下莫不聞無乃不可加兵乎秦君以為然乃案兵而轍不攻魏文侯可謂善用兵矣夫君子善用兵也不見其形而攻已成其此之謂也野人之用兵鼓聲則似雷號呼則動地塵氣充天流矢如雨扶傷舉死履腸涉血無罪之民其死者已量于澤矣而國之存亡主之死生猶未可知也其離仁義亦遠矣

公季成謂魏文侯曰田子方雖賢人然而非有土之君

也君常與之齋禮假有賢於子方者君又何以加之文
侯曰如子方者非成所得議也子方仁人也仁人也者
國之寶也智士也者國之器也博通士也者國之尊也
故國有仁人則羣臣不爭國有智士則無四鄰諸侯之
患國有博通之士則人主尊固非成之所議也公季成
自退於郊三日請罪

孟嘗君問於白圭曰魏文侯名過於桓公而功不及五
伯何也白圭對曰魏文侯師子夏友田子方敬段干木

此名之所以過於桓公也卜相則曰成與黃孰可此功之所以不及五伯也以私愛妨公舉在職者不堪其事故功廢然而名號顯榮者三士翊之也如相三士則王功成豈特霸哉

燕昭王收破燕後即位卑身厚幣以招賢者欲將報讎故往見郭隗先生曰齊因孤國之亂而襲破燕孤極知燕小力不足以報然得賢士與共國以雪先王之恥孤之願也敢問以國報讎者奈何郭隗先生對曰帝者與

師處王者與友處霸者與臣處亡者與役處誶指而事
之北面而受學則百已者至先趨而後息先問而後嘿
則十已者至人趨則若已者至馮几據杖眄視指使則
厮役之人至若恣睢奮擊响藉叱咄則徒隸之人至矣
此古服道致士之法也王誠博選國中之賢者而朝其
門下天下聞王朝其賢臣天下之士必趨於燕矣昭王
曰寡人將誰朝而可郭隗先生曰臣聞古之君人有以
千金求千里馬者三年不能得涓人言於君曰請求之

君遣之三月得千里馬馬已死買其骨五百金反以報
君君大怒曰所求者生馬安事死馬而捐五百金涓人
對曰死馬且買之五百金况生馬乎天下必以王為能
市馬馬今至矣於是不能期年千里馬之至者三今王
誠欲致士先從隗始隗且見事况賢於隗者乎豈遠千
里哉於是昭王為隗築宮而師之樂毅自魏往鄒衍自
齊往劇辛自趙往士爭湊燕燕王弔死問生與百姓同
其甘苦二十八年國殷富士卒樂佚輕戰於是遂以樂

毅為上將軍與秦楚三晉合謀以伐齊齊兵敗閔王出
走於外燕兵獨追北入至臨淄盡取齊寶燒其宮室宗
廟齊城之不下者唯獨莒即墨

趙簡子問於壯馳茲曰東方之士孰為瘡壯馳茲拜曰
敢賀簡子曰未應吾問何賀對曰臣聞之國家之將興
也君子自以為不足其亡也若有餘今主任晉國之政
而問及小人又求賢人吾是以賀

秦國自河山以東疆國六與齊威楚宣魏惠燕悼韓哀

趙成侯並淮泗之間小國十餘楚魏與秦接界魏築長城自鄭濱洛以北有上郡楚自漢中南有巴黔中周室微諸侯力政爭相併秦僻在雍州不與中國諸侯之會盟夷翟遇之孝公於是布惠振孤寡招戰士明功賞下令國中曰昔我穆公自岐雍之間脩德行武東平晉亂以河為界西霸戎翟廣地千里天子致伯諸侯畢賀為後世開業甚光美會往者厲躁簡公出子之不寧國家內憂未遑外事三晉攻奪我先君河西地諸侯卑秦醜

莫大焉獻公即位鎮撫邊境徙治櫟陽且欲東伐復繆公之故地脩繆公之政令寡人思念先君之意常痛於心賓客羣臣有能出奇計彊秦者吾且尊官與之分土於是乃出兵東圍陝城西斬戎之獮王衛鞅聞是令下西入秦因景監求見孝公

漢高帝求賢詔 蓋聞王者莫高於周文伯者莫高於齊桓皆待賢人而成名今天下賢者智能豈特古之人乎患在人主不交故也士奚由進今吾以天之靈賢士

大夫定有天下以為一家欲其長久世世奉宗廟亡絕也賢人已與我共平之矣而不與吾共安利之可乎賢士大夫有肯從我游者吾能尊顯之布告天下使明知朕意御史大夫昌下相國相國鄼侯下諸侯王御史中執法下郡守其有意稱明德者必身勸為之駕遣詣相國府署行義年有而弗言覺免年老癯病勿遣

武帝下州郡求賢詔 蓋有非常之功必待非常之人故馬或奔蹏而致千里士或有負俗之累而立功名夫

泛駕之馬跣弛之士亦在御之而已其令州縣察吏民
有茂才異等可為將相及使絕國者

議不舉孝廉者罪詔 公卿大夫所使總方略壹統類
廣教化美風俗也夫本仁祖義褒德錄賢勸善刑暴五
帝三王所繇昌也朕夙興夜寐嘉與宇內之士臻於斯
路故旅耆老復孝敬選豪俊講文學稽叅政事祈進民
心深詔執事興廉舉孝庶幾成風紹休聖緒夫十室之
邑必有忠信三人並行厥有我師今或至闔郡而不薦

一人是化不下究而積行之君子壅於上聞也二千石
官長紀綱人倫將何以佐朕燭幽隱勸元元厲蒸庶崇
鄉黨之訓哉且進賢受上賞蔽賢蒙顯戮古之道也其
與中二千石禮官博士議不舉孝廉者罪

昭帝舉賢良文學詔 朕以眇身獲保宗廟戰戰栗栗
夙興夜寐脩古帝王之事通保傅傳孝經論語尚書未
云有明其令三輔太常舉賢良各二人郡國文學高第
各一人

宣帝令郡國舉孝弟等詔 朕既不逮導民不明反側
晨興念慮萬方不忘元元唯恐羞先帝聖德故並舉賢
良方正以親萬姓歷載臻茲然而俗化闕焉傳曰孝弟
也者其為仁之本與其令郡國舉孝弟有行義聞於鄉
里者各一人

舉孝廉詔 人不患其不知患其為詐也不患其不勇
患其為暴也不患其不富患其亡厭也其唯廉士寡欲
易足今訾算十以上迺得官廉士算不必衆布市籍不

得官無訾又不得官朕甚愍之訾算四得官亡令廉士
久失職貪夫長利

晉虞預上書 大晉受命於今五十餘載自元康以來
王德始闕京師淪于逆賊宗廟焚為灰燼千里無烟爨
之氣華夏無冠帶之人自天地開闢書籍所載大亂之
極未有若茲者也陛下以聖德先覺超然遠鑒作鎮東
南聲教遐被上天眷顧人神贊謀雖云中興其實受命
少康宣王誠未足喻然南風之歌可著而陵遲之俗未

改者何也臣愚謂為國之要在於得才得才之術在於
抽引苟其可用雖賤必舉高宗文王思佐發夢拔巖徒
以為相載釣老而師之下至列國亦有斯事故燕重郭
隗而三士競至魏式干木而秦兵退舍今天下雖弊人
士雖寡十室之邑必有忠信世不乏驥求則可致而東
帛未賁于丘園蒲輪頓轂而不駕所以大化不洽而雍熙
有關者也

姚興如三原顧謂羣臣曰古人有言關東出相關西出

將三秦饒雋異汝潁多竒士吾應天明命跨據中原自
流沙已東淮漢已北未嘗不傾已招求冀匡不逮然明
不照下弗感懸魚至于智効一官行著一善吾歷級而
進之不使有後門之嘆卿等宜明揚仄陋助吾舉之梁
喜對曰奉旨求賢弗曾休倦未見儒亮大才王佐之器
可謂世之乏賢興曰自古霸王之起也莫不將則韓吳
相兼蕭鄧終不採將于往賢求相於後哲卿自識拔不
明求之不至奈何厚誣四海乎

庾冰兄弟及何充等相繼卒簡文帝時在藩始綜萬幾衛將軍褚裒薦殷浩徵為建武將軍揚州刺史浩上疏陳讓并致牋於簡文具自申敘簡文荅曰屬當厄運弊理盡誠賴時有其才不復遠求版築足下深識淹長思綜通練起而用之足以經濟若復深存挹退苟遂本懷吾恐天下之事於此去矣今絃領不振晉綱不綱願蹈東海復可得耶由此言之足下去就即是時之廢興時之廢興則國家不異足下弘思之靜算之亦將有以深鑒可否望必廢本懷率

羣情也浩頻陳讓自三月至七月乃受拜焉

簡文帝求賢詔 朕居阿衡三世不能濟彼時雍乃至海西失德殆傾皇祚賴祖宗靈祇之德皇太后淑體應期藩輔忠賢百官戮力用能蕩氛霧于昊蒼耀宸輝于宇宙遂以眇身託于王公之上思賴羣賢以弼其闕夫敦本息末抑絕華競使清濁異流能否殊貫官無執政士無謗讟不有懲勸則德禮焉施且彊寇未殄勞役未息自非軍國戎祀之要其華飾煩費之用皆省之夫肥

遁窮谷之賢滑泥揚波之士雖抗志玄霄潛默幽岫貪
屈高尚之道以隆協贊之美孰與自足山水棲遲丘壑
徇匹夫之潔而忘兼濟之大耶古人不借賢於曩代朕
所以虛想於今日內外百官各勤所司使善無不達惡
無不聞令詩人無素餐之刺而吾獲虛心之求焉

濟陰太守蜀人文立表以命士有贄為煩請絕其禮幣
詔從之皇甫謐聞而嘆曰亡國之大夫不可與圖存而
以革歷代之制其可乎夫束帛芟芟易之明義玄纁之

贖自古之舊也故孔子稱夙夜強學以待問席上之珍以待聘士于是乎三揖乃進明致之難也一讓而退明去之易也若殷湯之於伊尹文王之於太公或身即莘野或就載以歸唯恐禮之不重豈吝其煩費哉且一禮不備貞女恥之况命士乎孔子曰賜也爾愛其羊我愛其禮棄之如何政之失賢於此乎在矣

唐湖南王國良為盜代宗遣闕播招撫之辭行代宗問以為政之要對曰為政之本必求有道賢人與之為理

代宗曰朕比以下詔求賢又遣使廣加搜訪庶幾可以為理乎對曰下詔所求及使者所薦唯得文詞干進之士耳安有有道賢人肯隨牒舉選乎代宗悅

宋宇文之邵上神宗皇帝書 古之求賢者數路以取之寵以好爵厚其禮命唯恐其去也而猶有三聘而不顧者有閉門而不納者有踰垣而避之者臣諫於其君而三不聽則去之其至於郊也君必使人要之年七十而致其事君不聽則必以儿杖錫之猶有不稅冕而行

者有辭三公而為人灌園者今日仕進之門國家直患不能塞之爾科防日增格令日繁來者日甚拒之日峻猶有假名氏以竊官號匿苦塊之哀以干寵祿少者增齒以希蚤仕老者匿年以幸晚祿譬之隄防之壞塞其一穴一穴又決蕩然莫之能止也今限年致仕著於令矣又患其去之不速令於門闕以示百僚而猶不知止者甚可痛也陛下盍稍補其弊隆於待士之意示之以至廉之實使衣冠者人人自重庶幾風教之美少近於古

寶賢 三則附

魯孟獻子聘於晉宣子觴之三徙鍾石之懸不移而具
獻子曰富哉家宣子曰子之家孰與我家富獻子曰吾
家甚貧惟有二士曰顏回茲無靈者使吾邦家安平百
姓和協惟此二者耳吾盡於此矣客出宣子曰彼君子
也以養賢為富我鄙人也以鐘石金玉為富孔子曰孟
獻子之富可著於春秋

楚王孫圉聘於晉定公饗之趙簡子鳴玉以相問於王

孫圉曰楚之白珩猶在乎對曰然簡子曰其為寶也幾何矣曰未嘗為寶楚之所寶者曰觀射父能作訓辭以行事於諸侯使無以寡君為口實又有左史倚相能道訓典以敘百物以朝夕獻善敗於寡君使寡君無忘先王之業又能上下說乎鬼神順道其欲惡使神無有怨痛於楚國又有數曰雲連徒洲金木竹箭之所生也龜珠齒角皮革羽毛所以備賦用以戒不虞者也所以共幣帛以賓享於諸侯者也若諸侯之好幣具而導之以

訓辭有不虞之備而皇神相之寡君其可以免罪於諸侯而國民保焉此楚國之寶也若夫白珩先王之玩也何寶焉圉聞國之寶六而已聖能制議百物以輔相國家則寶之玉足以庇蔭嘉穀使無水旱之災則寶之龜足以憲臧不則寶之珠足以禦火災則寶之金足以禦兵亂則寶之山林藪澤足以備財用則寶之若夫譁囂之美楚雖蠻夷不能寶也經侯往適魏太子左帶羽玉具劔右帶環佩左光照右右光照左坐有頃太子不視也又不問也經侯曰魏國亦有寶乎

太子曰有經侯曰其寶何如太子曰主信臣忠百姓上戴此
魏之寶也經侯曰吾所問者非是之謂也乃問其器而已
太子曰有徒師治治魏而市無預賈郟辛治陽而道不拾遺芒
卯在朝而四隣賢士無不相因而見此三大夫乃魏國之大寶
於是經侯默然不應左解玉具右解環佩委之坐愆然
而起默然不謝趨而出上車馳去魏太子使騎操劍佩逐與
經侯使告經侯曰吾無德所寶不能為珠玉所守此寒不
可衣饑不可食無為遺我賊於是經侯杜門不出傳死

薦賢 四十二則

呂覽贊能篇 賢者善人以人中人以事不肖者以財
得十良馬不若得一伯樂得十良劍不若得一歐冶得
地千里不若得一聖人舜得臯陶而舜受之湯得伊尹
而有夏民文王得呂望而服殷商夫得聖人豈有里數
哉管子束縛在魯桓公欲相鮑叔鮑叔曰吾君欲霸王
則管夷吾在彼臣弗若也桓公曰夷吾寡人之賊也射
我者也不可鮑叔曰夷吾為其君射人者也君若得而

臣之則彼亦將為君射人桓公不聽強相鮑叔固辭讓而相桓公果聽之於是乎使人告魯曰管夷吾寡人之讎也願得之而親加手焉魯君許諾乃使吏鞞其拳膠其目盛之以鴟夷置之車中至齊境桓公使人以朝車迎之祓以燿火釁以犧豭焉生與之如國命有司除廟筵几而薦之曰自孤之聞夷吾之言也目益明耳益聰孤弗敢專敢以告於先君因顧而命管子曰夷吾佐子管仲還走再拜稽首受令而出管子治齊國舉事有功

桓公必先賞鮑叔曰使齊國得管子者鮑叔也桓公可謂知行賞矣凡行賞欲其本也本則過無由生矣孫叔敖沈尹筮相與友叔敖遊於郢三年聲問不知脩行不聞沈尹筮謂孫叔敖曰說義以聽方術信行能令人主上至於王下至於霸我不若子也耦世接俗說義調均以適主心子不如我也子何以不歸耕乎吾將為子游沈尹筮遊於郢五年荆王欲以為令尹沈尹筮辭曰期思之鄙人有孫叔敖者聖人也王必用之臣不若也荆

王於是使人以王輿迎叔敖以為令尹十二年而莊王霸此沈尹筮之力也功無大乎進賢

劉向脩文篇 諸侯三年一貢士士一適謂之好德再適謂之尊賢三適謂之有功有功者天子一賜以輿服弓矢再賜以鬯三賜以虎賁百人號曰命諸侯命諸侯者隣國有臣弑其君孽弑其宗雖不請乎天子而征之可也已征而歸其地於天子諸侯貢士一不適謂之過再不適謂之傲三不適謂之誣誣者天子黜之一黜以

爵再黜以地三黜而地畢諸侯有不貢士謂之不率正
不率正者天子黜之一黜以爵再黜以地三黜而地畢
然後天子比年秩官之無文者而黜之以諸侯之所貢
士代之詩云濟濟多士文王以寧此之謂也

子貢問孔子曰今之人臣孰為賢孔子曰吾未識也往
者齊有鮑叔鄭有子皮賢者也子貢曰然則齊無管仲
鄭無子產乎子曰賜汝徒知其一不知其二汝聞進賢
為賢邪用力為賢邪子貢曰進賢為賢子曰然吾聞鮑

叔之進管仲也聞子皮之進子產也未聞管仲子產有所進也

晉文公問於咎犯曰誰可使為西河守者咎犯對曰虞子羔可也公曰非汝之讐耶對曰君問可為守者非問臣之讐也羔見咎犯而謝之曰幸赦臣之過薦之於君得為西河守咎犯曰薦子者公也怨子者私也吾不以私事害公義子其去矣顧吾射子也

曰季使過冀見冀缺攝其妻饁之敬相待如賓與之歸

言諸文公曰敬德之聚也能敬必有德德以治民君請
用之臣聞之出門如賓承事如祭仁之則也公曰其父
有罪可乎對曰舜之罪也殛絲其舉也興禹管敬仲桓
之賊也實相以濟康誥曰父不慈子不祇兄不友弟不
共不相及也詩曰采葑采菲無以下體君取節焉可也
文公以為下軍大夫反自箕襄公以三命命先且居將
中軍以再命命先茅之縣賞胥臣曰舉卻缺子之功也
以一命命卻缺為脚復與之冀亦未有軍行

祁奚請老晉侯問嗣焉稱解狐其讎也將立之而卒又問焉對曰午也可於是羊舌職死矣晉侯曰孰可以代之對曰赤也可於是使祁午為中軍尉羊舌赤佐之君子謂祁奚於是能舉善矣稱其讎不為諂立其子不為比舉其偏不為黨商書曰無偏無黨王道蕩蕩其祁奚之謂矣解狐得舉祁午得位伯華得官建一官而三物成能舉善也夫唯善故能舉其類詩云惟其有之是以似之祁奚有焉

韓宣子卒魏獻子為政分祁氏之田以為七縣分羊舌氏之田以為三縣司馬彌牟為鄆大夫賈辛為祁大夫司馬烏為平陵大夫魏戊為梗陽大夫知徐吾為塗水大夫韓固為馬首大夫孟丙為孟大夫樂霄為銅鞮大夫趙朝為平陽大夫僚安為楊氏大夫謂賈辛司馬烏為有力於王室故舉之謂知徐吾趙朝韓固魏戊餘子之不失職能守業者也其四人者皆受縣而後見於魏子以賢舉也魏子謂成鱄吾與戊也縣人其以我為黨

乎對曰何也戊之為人也遠不忘君近不偪同居利思
義在約思純有守心而無淫行雖與之縣不亦可乎昔
武王克商光有天下其兄弟之國者十有五人姬姓之
國者四十人皆舉親也夫舉無他唯善所在親疏一也
詩曰唯此文王帝度其心莫其德音其德克明克明克
類克長克克君王此大國克順克比比于文王其德靡悔
既受帝祉施于孫子心能制義曰度德正應和曰莫照
臨四方曰明勤施無私曰類教誨不倦曰長賞慶刑威

曰君慈和徧服曰順擇善而從之曰比經緯天地曰文
九德不愆作事無悔故襲天祿子孫賴之主之舉也近
文德矣所及其遠哉賈辛將適其縣見於魏子魏子曰
辛來昔叔向適鄭驪茂惡欲觀叔向從使之收器者而
往立於堂下一言而善叔向將飲酒聞之曰必驪明也
下執其手以上曰昔賈大夫惡娶妻而美三年不言不
笑御以如臯射雉獲之其妻始笑而言賈大夫曰才之
不可以已我不能射女遂不言不笑夫今子少不颺子

若無言吾幾失子矣言之不可以已也如是遂如故知
今女有力於王室吾是以舉女行乎敬之哉毋墮乃力
仲尼聞魏子之舉也以為義曰近不失親遠不失舉可
謂義矣又聞其命費辛也以為忠詩曰永言配命自求
多福忠也魏子之舉也義其命也忠其長有後於晉國乎
淳于髡一日而見七人於宣王王曰子來寡人聞之十
里而一士是比肩而立百世而一聖若隨踵而至也今
子一朝而見七士則士不亦衆乎淳于髡曰不然夫鳥

同翼者而聚居獸同足者而俱行今求柴胡桔梗於沮澤則累世不得一焉及至罽秦梁父之陰則却車而載耳夫物各有疇今髡賢者之疇也王求士於髡若挹水於河而取火於燧也髡將復見之豈特七士也

楚令尹虞丘子復于莊王曰臣聞奉公行法可以得榮能淺行薄無望上位不名仁智無求顯榮才之所不著無當其處臣為令尹十年矣國不加治獄訟不息處士不升淫禍不討久踐高位妨羣賢路尸祿素餐貪欲無

厭臣之罪當稽於理臣竊選國俊下里之士曰孫叔敖
秀羸多能其性無欲君舉而授之政則國可使治而士
民可使附莊王曰子輔寡人寡人得以長於中國令行
於絕域遂伯諸侯非子如何虞丘子曰久固祿位者貪
也不進賢達能者誣也不讓以位者不廉也不能三者
不忠也為人臣不忠君王又何以為忠臣願固辭莊王
從之賜虞子采地三百號曰國老以孫叔敖為令尹少
馬虞邱子家干法孫叔敖執而戮之虞邱子烹入見於

王曰臣言孫叔敖果可使持國奉國法而不黨施刑罰而不亂可謂公平莊王曰夫子之賜也已

田子方渡西河造翟黃翟黃乘軒車載華蓋黃金之勒約鎮簞席如此者其駟八十乘子方望之以為人君也道狹下抵車而待之翟黃至而睹其子方也下車而趨自投下風曰觸田子方曰子與吾嚮者望子疑以為人君也子至而人臣也將何以至此乎翟黃對曰此皆君之所以賜臣也積三十歲故至於此時以閒暇祖之曠

野正逢先生子方曰何子賜車饗之厚也翟黃對曰昔者西河無守臣進吳起而西河之外寧鄴無令臣進西門豹而魏無趙患酸棗無令臣進北門可而魏無齊憂魏欲攻中山臣進樂羊而中山拔魏無使治之臣臣進李克而魏國大治是以進此五大夫者爵祿倍以故至於此子方曰可子勉之矣魏國之相不去子而之他矣翟黃對曰君母弟有公孫季成者進子夏而君師之進段干木而君友之進先生而君敬之彼其所進師也友

也所敬者也臣之所進者皆守職守祿之臣也何以至
魏國相乎子方曰吾聞身賢者賢也能進賢者亦賢也
子之五舉者盡賢子勉之矣子終其次也

齊威王遊於瑤臺成侯卿來奏事從車羅綺甚衆王望
之謂左右曰來者何為者也左右曰成侯卿也王曰國
至貧也何出之盛也左右曰與人者有以責之也受人
者有以易之也王試問其說成侯卿至上謁曰忌也王
不應又曰忌也王不應又曰忌也王曰國至貧也何出

之盛也成侯卿曰赦其死罪使臣得言其說王曰諾對曰忌舉田居子為西河而秦梁弱忌舉田解子為南城而楚人抱羅綺而朝忌舉黔涿子為冥州而燕人給牲趙人給盛忌舉田種首子為即墨而於齊足究忌舉北勃刁子為大士而九族益親民益富此數良人者王枕而卧耳何患國之貧哉

少室周者古之貞廉潔慤者也為趙襄王力士與中牟徐子角力不若也入言之襄王以自代也襄王曰子之

處人之所欲也何為言徐子以自代曰臣以力事君者也今徐子力多臣臣不以自代恐他人言之而為罪也韓信亡楚歸漢未得知名為連敖坐法當斬其輩十三人皆已斬次至信信乃仰視適見滕公曰上不欲就天下乎何為斬壯士滕公竒其言壯其貌釋而不斬與語大說之言於上上拜以為治粟都尉上未之竒也信數與蕭何語何竒之至南鄭諸將行道亡者數十人信庶何等已數言上上不我用即亡何聞信亡不及以聞自

追之人有言上曰丞相何亡上大怒如失左右手居一
二日何來謁上上且怒且喜罵何曰若亡何也何曰臣
不敢亡也臣追亡者上曰若所追者誰何曰韓信也上
復罵曰諸將亡者以十數公無所追追信詐也何曰諸
將易得耳至如信者國士無雙王必欲長王漢中無所
事信必欲爭天下非信無所與計事者顧王策安所決
耳王曰吾亦欲東耳安能鬱鬱久居此乎何曰王計必
欲東能用信信即留不能用信終亡耳王曰吾為公以

為將何曰雖為將信必不留王曰以為大將何曰幸甚
於是王欲召信拜之何曰王素慢無禮今拜大將如呼
小兒耳此乃信所以去也王必欲拜之擇良日齋戒設
壇場具禮乃可耳王許之諸將皆喜人人各自以為得
大將至拜大將乃韓信也一軍皆驚

文帝置三老孝悌力田常員詔 孝悌天下之大順也
力田為生之本也三老眾民之師也廉吏民之表也朕
甚嘉此二三大夫之行今萬家之縣云無應令豈實人

情是吏舉賢之道未備也其遺謁者勞賜三老孝者帛
人五匹悌者力田二匹廉吏二百石以上率百石者三
匹及問民所不便安而以戶口率置三老孝悌力田常
員令各率其意以道民焉

張敞為膠東相與朱邑書 明主游心太古廣延茂士
此誠忠臣竭思之時也直敞遠守劇郡馭於繩墨胸臆
約結固亡竒也雖有亦安所施足下以清明之德掌周
稷之業猶饑者甘糟糠穰歲餘梁肉何則存亡之勢異

也昔陳平雖賢須魏倩而後進韓信雖奇賴蕭公而後
信故事各達其時之英俊若必伊尹呂望而後薦之則
此人不因足下而進矣邑感敬言貢薦賢士大夫多得
其助者

谷永上成帝薦薛宣疏 帝王之德莫大於知人知人
則百僚任職天工不曠故臯陶曰知人則哲能官人御
史大夫內承本朝之風化外佐丞相統理天下任重職
大非庸材所能堪今當選於羣卿以克其缺得其人則

萬姓欣喜百僚說服不得其人則大職墮斃王功不興
虞帝之明在茲一舉可不致詳竊見少府薛宣材茂行
潔達於從政前為御史中丞執憲轂下不吐剛茹柔舉
錯時當出守臨淮陳留二郡稱治為左馮翊崇教養善
威德並行衆職脩理姦軌絕息辭訟者歷年不至丞相
府赦後餘盜賊什分三輔之一功效卓爾自左內史初
置以來未嘗有也孔子曰如有所譽其有所試宣考績
功課簡在兩府不敢過稱以奸欺誣之辜臣聞賢材莫

大於治人宣已有效其法律任廷尉有餘經術吏推足以謀王體斷國論身兼數器有退食自公之節宣無私黨游說之助臣恐陛下忽於羔羊之詩舍公實之臣任華虛之譽是用越職陳宣行能唯陛下留神考察

何武言傅喜書 喜行義脩潔忠誠憂國內輔之臣也今以寢病一旦遣歸衆庶失望皆曰傅氏賢子以論議不合於定陶太后故退百寮莫不為國恨之忠臣社稷之衛魯以季友治亂楚以子玉輕重魏以無忌折衝項

以范增存亡故楚跨有南土帶甲百萬隣國不以為難
子玉為將則文公側席而坐及其死也君臣相慶百萬
之衆不如一賢故秦行千金以間廉頗漢散萬金以疏
亞父喜立於朝陛下之光輝傅氏之廢興也

光武征張步留伏港居守時蒸祭高廟而河南尹司隸
校尉於廟中爭論港不舉奏坐策免六年徙封不其侯
就國南陽太守杜詩上疏薦港 臣聞唐虞以股肱康
文王以多士寧是故詩稱濟濟書曰良哉臣詩竊見故

大司徒陽都侯伏湛自行束脩訖無毀玷篤信好學守
死善道經為人師行為儀表前在河內朝歌及居平原
吏人畏愛則而象之遭時反覆不離兵凶秉節持重有
不可奪之志陛下深知其能顯以宰相之重衆賢百姓
仰望德義微過斥退久不復用有識所惜儒士痛心臣
竊傷之湛容貌堂堂國之光輝智略謀慮朝之淵數髻
髮厲志白首不衰實足以先後王室名足以示遠人古
者選擢諸侯以為公卿是故四方回首仰望京師柱石

之臣宜居輔弼出入禁門補闕拾遺臣詩愚戇不足以
知宰相之才竊懷區區敢不自竭臣前為侍御史上封
事言港公廉愛下好惡分明累世儒學素持名信經明
行脩通達國政尤宜近侍納言左右舊制九州五尚書
今一郡二人可以港代頗為執事所非但臣詩蒙恩深
渥所言誠有益於國雖死無恨故復越職觸冒以聞
第五倫薦謝夷吾疏 臣聞堯登稷契政隆太平舜用
皋陶政治雍熙殷周雖有高宗昌發之君猶賴傅說呂

望之策故能克崇其業允協大中竊見鉅鹿太守會稽
謝夷吾出自中州厥土塗泥而英姿挺特竒偉秀出才
兼四科行包九德仁足濟時知周萬物加以少膺儒雅
韜含六籍推考星度綜校圖錄探蹟聖祕觀變歷徵占
天知地與神合契據其道德以經王務昔為陪隸與臣
從事奮忠毅之操躬史魚之節董臣嚴剛勗臣懦弱得
以免戾實賴厥勲及其應選作宰惠敷百里降福彌異
流祥若神爰牧荊州威行邦國奉法作政有周召之風

居儉履約紹公儀之操尋公簡能為外臺之表聽深察
實為九伯之冠遷守鉅鹿政合時雍德量績謀有伊呂
管晏之任闡弘道與同史蘇京房之倫雖密勿在公而
身出心隱不徇名以求譽不馳騫以要寵念存遜道演
志箕山方之古賢實有倫序採之于今超然絕俗誠社
稷之元龜大漢之棟甍宜當拔擢使登鼎司上令三辰
順軌于歷象下使五品咸訓于嘉時以致徵休克昌之
慶非徒循法奉職而已臣以頑駑器非其疇尸祿負乘

夕惕若厲願乞骸骨更授夷吾上以光七曜之明下以厭率土之望庶令微臣塞咎免悔

吳良初為郡吏歲旦與掾史入賀門下掾王望舉觴上壽諂稱太守功德良於下坐勃然進曰望佞邪之人欺諂無狀願勿受其觴太守斂容而止燕罷轉良為功曹恥以言受進終不肯謁時驃騎將軍東平王蒼聞而辟之署為西曹蒼甚相敬愛上疏薦良臣聞為國所重必在得人報恩之義莫大薦士竊見臣府西曹掾齊國

吳良資質敦固公方廉恪躬儉安貧白首一節又治尚書學通師法經任博士行中表儀宜備宿衛以輔聖政臣蒼榮寵絕矣憂責深大私慕公叔同升之義懼於臧文竊位之罪敢秉愚瞽犯冒嚴禁

班固奏記東平王蒼 將軍以周召之德立乎本朝承休明之策建威靈之號在昔周公今也將軍詩書所載未有三此者也傳曰必有非常之人然後有非常之事有非常之事然後有非常之功固幸得生於清明之世

豫在視聽之末私以螻螻竊觀國政誠美將軍擁千載
之任躡先聖之蹤體弘懿之姿據高明之執博貫庶事
服膺六藝白黑簡心求善無厭採擇狂夫之言不逆負
薪之議竊見幕府新開廣延羣俊四方之士顛倒衣裳
將軍宜詳唐殷之舉察伊臯之薦令遠近無偏幽隱必
達期於總覽賢才收集明智為國得人以寧本朝則將
軍養志和神優游廟堂光名宣於當世遺烈著於無窮
竊見故司空掾桓梁宿儒盛名冠德州里七十從心行

不踰矩蓋清廟之光輝當世之俊彥也京兆祭酒晉馮
結髮脩身白首無違好古樂道玄默自守古人之美行
時俗所莫及扶風掾李育經明行著教授百人客居杜
陵茅室土階京兆扶風二郡更請徒以家貧數辭病去
溫故知新論議通明廉清修潔行能純備雖前世名儒
國家所器韋平孔翟無以加焉宜令考績以參萬事京
兆督郵郭基孝行著於州里經學稱於師門政務之績
絕異之效如得及明時秉事下僚進有羽翮奮翔之用

退有杞梁一介之死涼州從事王雍躬卞嚴之節文之
以術藝涼州冠蓋未有宜先雍者也古者周公一舉則
三方怨曰奚為而後已宜及府開以慰遠方弘農功曹
史殷肅達學洽聞才能絕倫誦詩三百奉使專對此六
子者皆有殊行絕才德隆當世如蒙徵納以輔高明此
山梁之秋夫子所為歎也昔卞和獻寶以離斷趾靈均
納忠終於沈身而和氏之璧千載垂光屈子之篇萬世
歸善願將軍隆照微之明信日昃之聽少屈威神咨嗟

下問令塵埃之中永無荆山汨羅之恨

樊準上安帝薦龐參疏 臣聞鷙鳥累百不如一鷄昔

孝文皇帝悟馮唐之言而赦魏尚之罪使為邊守匈奴不敢南向夫以一人之身折方面之難者選用得也臣伏見故左校今河南龐參勇謀不測卓爾奇偉高才武畧有魏尚之風前坐法輸作經時今羌戎為患大將西屯臣以為如參之人宜在行伍惟明詔採前世之舉觀魏尚之功免赦參刑以為軍鋒必有成效宣助國威

陳忠薦劉愷疏 臣聞三公上則台階下象山岳股肱
元首鼎足居職協和陰陽調訓五品考功量才以序庶
僚遭烈風不迷遇迅雨不惑位莫重焉而今上司缺職
未議其人臣竊差次諸卿考合衆議咸稱太常朱伧少
府荀遷臣父寵前忝司空伧遷並為掾屬具知其能伧
能說經書而用心褊狹遷嚴毅剛直而薄於藝文伏見
前司徒劉愷沈重淵懿道德博備克讓爵土致祚弱弟
躬浮雲之志兼浩然之氣頻歷二司舉動得禮以疾致

仕側身里巷處約思純進退有度百僚景式海內歸懷
往者孔光師丹近世鄧彪張酺皆去宰相復序上司誠
宜簡練卓異以厭衆望

郎顛乞徵黃瓊李固并消弭災書 臣前對七事要政

急務宜於今者所當施用誠知愚淺不合聖聽人賤言
廢當受誅罰怔營惶怖靡知厝身臣聞剗舟剗楫將欲
濟江海也聘賢選佐將以安天下也昔唐堯在上羣龍
為用文武創德周召作輔是以能建天地之功增日月

之耀者也詩云赫赫王命仲山甫將之邦國若否仲山甫明之宣王是賴以致雍熙陛下踐阼以來勤心衆政而三九之位未見其人是以災害屢臻四國未寧臣考之國典驗之聞見莫不以得賢為功失事為敗且賢者出處翔而後集爵以德進則其情不苟然後使君子恥貧賤而樂富貴矣若有德不報有言不酬來無所樂進無所趨則皆懷歸歎澤脩其故志矣夫求賢者上以承天下以為人不用之則逆天統違人望逆天統則災眚降

違人望則化不行災眚降則下呼嗟化不行則君道虧
四始之缺五際之危其咎如此豈可不剛健篤實矜矜
慄慄以守天功盛德大業乎臣伏見光祿大夫江夏黃
瓊耽道樂術清亮自然被褐懷寶含味經籍又果於從
政明達變復朝廷前加優寵賓於上位瓊入朝日淺謀
謨未就因以喪病致命遂志老子曰大音希聲大器晚
成善人為國三年乃立天下莫不嘉朝廷有此良人而
復恠其不時還任陛下宜加隆崇之恩極養賢之禮徵

反京師以慰天下又處士漢中李固年四十通游夏之
藝履顏閔之仁潔白之節情同皦日忠貞之操好是正
直卓冠古人當世莫及元精所生王之佐臣天之生固
必為聖漢宜蒙特徵以示四方夫有出倫之才不應限
以官次昔顏子十八天下歸仁子竒穉齒化阿有聲若
還瓊傲固任以時政伊尹傳說不足為比則可垂景光
致休祥矣臣顛明不知人伏聽衆言百姓所歸臧否共
歎願汎問百僚覈其名行有一不合則臣為欺國惟留

聖神不以人廢言謹復條便四事附奏於左

史啟上順帝薦胡廣疏 臣聞德以旌賢爵以建事明

試以功典謨所美五服五章天秩所祚是以臣竭其忠

君豐其寵舉不失德下忘其死竊見尚書僕射胡廣體

真履規謙虛溫雅博物洽聞探蹟窮理六經典與舊章

憲式無所不覽柔而不犯文而有禮忠真之性憂公如

家不矜其能不伐其勞翼翼周慎行靡玷漏密勿夙夜

十有餘年心不外顧志不苟進臣等竊以為廣在尚書

幼勞日久後母年老既蒙簡照試職千里匡寧方國陳
留近郡今太守任缺廣才畧深茂堪能撥煩願以參選
紀綱類俗使東脩守善有所勸仰

合浦郡不產穀實而海出珠寶與交趾比境常通商販
貿糶糧食先時守宰並多貪穢詭人采求不知紀極珠
遂徙於交趾郡界於是行旅不至人物無資貧者死饑
於道會稽上虞孟嘗到官革易前敝求民利病曾未踰
歲去珠復還百姓皆反其業商貨流通稱為神明以病

自上被徵當還吏民攀車請之嘗既不得進乃載鄉民
舩夜遁去隱處窮澤身自耕傭隣縣士民慕其德就居
止者百餘家桓帝時尚書同郡楊喬上書薦孟嘗 臣
前後七表言故合浦太守孟嘗而身輕言微終不蒙察
區區破心徒然而已嘗安仁弘義耽樂道德清行出俗
能幹絕羣前更守宰移風改政去珠復還饑民蒙活且
南海多珍財產易積掌握之內價盈兼金而嘗單身謝
病躬耕壟次匿景藏采不揚華藻寶羽翮之美用非徒

腹背之毛也而沈淪草莽好爵莫及廊廟之寶棄於溝
渠且年歲有訖桑榆行盡而貞忠之節永謝聖時臣誠
傷心私用流涕夫物以遠至為珍士以稀見為貴槃木
朽株為萬乘用者左右為之容耳王者取士宜拔衆之
所貴臣以斗筭之姿趨走日月之側思立微節不敢苟
私鄉曲竊感禽息亡身薦賢

蔡邕上大將軍何進書 伏惟幕府初開博選清英華
髮舊德並為元龜雖振鷺之集西雍濟濟之在周庭無

以或加竊見令史陳留邊讓天授逸才聰明賢智髻亂
風孤不盡家訓及就學廬便就大典初涉諸經見本知
義授者不能對其問章句不能建其意心通性達口辨
辭長非禮不動非法不言若處狐疑之論定嫌審之分
經典交至檢括叅合衆夫寂焉莫之能奪也使讓生唐
虞則元凱之次運值仲尼則顏冉之亞豈徒俗之凡偶
近器而已者哉階級名位亦宜超然若復隨輩而進非
所以章壞偉之高價昭知人之絕明也傳曰函牛之鼎

以烹雞多汁則淡而不可食少汁則熬而不熟此言大器之於小用固有所不宜也邕竊恨邑怪此寶鼎未受犧牛大羹之和久在煎熬鬻割之間願明將軍回謀垂慮裁加少納貢之機密展之力用若以年齒為嫌則顏回不得貫德行之首子奇終無理阿之功苟堪其事古今一也

薦皇甫規表 臣聞唐虞以師師咸熙周文以濟濟為寧區區之楚猶用賢臣為寶衛多君子季札知其不危

由此言之忠臣賢士國家之元龜社稷之貞固也昔孝
文愍匈奴之事思李牧於前代孝宣忿奸邪之不散舉
張敞於亡命況在於當時謙虛為罪而可遺棄臣伏見
護羌校尉皇甫規少明經術道為儒宗脩身力行忠亮
闡著出處抱義皦然不污藏器林藪之中以辭徵召之
寵先帝嘉之羣公歸德盜發東岳莫能嬰討即起家叅
拜為太山太守屠斬桀黠綏撫甄弱青兗之郊迄用康
乂自是以來方外有事戎狄猾華進簡前勲連見委任

仗節舉麾威靈神行變凶悍使為慙愿愛財省穡每有
餘資養士御衆悅以亡死論其武勞則漢室之干城課
其文德則皇家之腹心誠宜試用以廣振鷺西雝之美
臣以頑愚忝污顯列輒流汗墨不堪之責不勝區區執
心所見越職瞽言罪當死唯陛下當留神省察

孔融上獻帝薦謝該書 臣聞高祖創業韓彭之將征
討暴亂陸賈叔孫通進說詩書光武中興吳耿佐命范
升衛宏脩述舊業故能文武並用成長久之計陛下聖

德欽明同符二祖勞謙危運三年乃謹今尚父膺揚方
叔翰飛王師電鷲羣凶破殄始有橐弓卧鼓之次宜得
名儒典綜禮記竊見故公車司馬令謝該體曾史之淑
性兼商偃之文學博通羣藝周覽古今物來有應事至
不疑清白異行敦悅道訓求之遠近少有疇匹若乃巨
骨出吳隼集陳庭黃熊入寢亥有二首非夫洽聞者莫
識其端也雋不疑定比闕之前夏侯勝辨常陰之驗然
後朝士益重儒術今該實卓然比跡前列間以父母老

疾棄官欲歸道路險塞無由自致猥使良才抱璞而逃
踰越山河沈淪荆楚所謂往而不返者也後日更當饋
樂以釣由余尅像以求傳說豈不煩哉臣愚以為可推
錄所在召該令還楚人止孫卿之去國漢朝追匡衡於
平原尊儒貴學惜失賢也

薦禰衡書 臣聞洪水橫流帝思俾乂旁求四方以招
賢俊昔孝武繼統將弘祖業疇咨熙載羣士響臻陛下
睿聖纂承基緒遭遇危運勞謙日昃惟岳降神異人並

出竊見平原處士禰衡年二十四字正平淑質貞亮英才卓犖初涉藝文升堂覩奧目所一見輒誦於口耳所暫聞不忘於心性與道合思若有神弘羊潛計安世默識以衡準之誠不足怪忠果正直志懷霜雪見善若驚疾惡若讐任座抗行史魚厲節殆無以過也鷙鳥累百不如一鷄使衡立朝必有可觀飛辯騁辭溢氣空涌解疑釋結臨敵有餘昔賈誼求試屬國詭係單于終軍欲以長纓牽致勁越弱冠慷慨前世美之近日路粹嚴象

亦用異才擢拜臺郎衡宜與為比如得龍躍天衢振翼
雲漢揚聲紫微垂光虹蜺足以昭近署之多士增四門
之穆穆鈞天廣樂必有奇麗之觀帝室皇居必蓄非常
之寶若衡等輩不可多得激楚陽阿至妙之容掌技者
之所貪飛兔騷裊絕足奔放良樂之所急臣等區區敢
不以聞

魏鍾繇薦季直表 臣繇言臣自遭遇先帝忝列腹心
爰自建安之初王師破賊關東時年荒穀貴郡縣殘毀

三軍餽饟朝不及夕先帝神略奇計委任得人深山窮
谷民獻米豆道路不絕遂使疆敵喪膽我衆作氣旬月
之間廓清蟻聚當時實用故山陽太守關內侯季直之
策尅期成事不差毫髮先帝賞以封爵授以劇郡今直
罷任旅食許下素為廉吏衣食不充臣愚欲望聖德錄
其舊勲矜其老困復畀一州俾圖報效直力氣尚壯必
能夙夜保養人民臣受國家異恩不敢雷同見事不言
蜀秦宓奏記劉焉 昔百里蹇叔以耆艾而定策甘羅

子奇以童冠而立功故書美黃髮而易稱顏淵固知選士用能不拘長幼明矣乃者以來海內察舉率多英雋而遺舊齒衆論不齊異同相半此乃承平之翔步非亂世之急務也夫欲救危撫亂脩己以安人則宜卓犖超倫與時殊趨震驚隣國駭動四方上當天心下合人意天人既和內省不疚雖遭凶亂何憂何懼昔楚葉公好龍神龍下之好偽徹天何況於真今處士任安仁義直道流名四遠如今見察則一州斯服昔湯舉伊尹不仁

者遠何武貢二龔雙名竹帛故貪尋常之高而忽萬仞之嵩樂面前之飾而忘天下之譽斯誠往古之所重慎也甫欲鑿石索玉剖蚌求珠今乃隨和炳然有如皎日復何疑哉誠知晝不操燭日有餘光但愚情區區貪陳所見

晉孝武帝時朝廷方以秦寇為憂詔求文武良將可以鎮禦北方者謝安以兄子玄應詔郝超聞之歎曰安之明乃能違衆舉親玄之才足以不負所舉衆咸以為不

然超曰吾嘗與玄共在桓公府見其使才雖履屐間未嘗不得其任是以知之玄募驍勇之士得劉牢之等數人以牢之為參軍常領精銳為前鋒戰無不捷時號北府兵敵人畏之

陸雲移書太常薦同郡張瞻 蓋聞在昔聖王承天御世殷薦明德思和人神莫不崇典謨以教思興禮學以陶遠是以帝堯昭煥而道協人天西伯質文而周隆二代大晉建皇崇配天地區夏既混禮樂將庸君侯應歷

運之會贊天人之期博陵俊茂熙隆載典伏見衛將軍
舍人同郡張瞻茂德清萃器思深通初慕聖門棲心重
仞啓塗及階遂升樞奧抽靈匱於祕宮披金滕於玄夏
思樂百氏博採其珍辭邁翰林言數其藻探微集逸思
心洞神論道厲書篇章光覲含竒宰府婆娑公門棲靜
隱寶淪虛藏器裝裳襲錦緇衣被玉曾泉改路懸車將
邁考盤下位歲聿屢遷措紳之士具懷愼恨方今大清
闢宇四門啓籥玄網括地天網廣羅慶雲興以招龍和

風起而儀鳳誠巖穴耀穎之秋河津託乘之目也而瞻
沈淪下位羣望悼心若得端委大學錯綜先典垂纓玉
階論道紫宮誠帝室之瑰寶清廟之偉器廣樂九奏必
登昊天之庭韶夏六變必饗上帝之祀矣

任昉為蕭揚州作薦士表 臣聞求賢暫勞垂拱永逸

方之疏壤取類導川伏惟陛下道隱旒纁信充符璽六
飛同塵五讓高世白駒空谷振鷺在庭猶懼隱鱗卜祝
藏器屠保物色闕下委裘河上非取製於一狐諒求味

於兼采而五聲倦響九工是詢寢議廟堂借聽與卓臣
位任隆重義兼家邦實欲使名實不違徼倖路絕勢門
上品猶當格以清談英俊下僚不可限以位貌竊見祕
書丞琅邪臣王暕年二十一字思晦七葉重光海內冠
冕神清氣茂允迪中和叔寶理遣之談彥輔名教之樂
故以暉映先達領袖後進居無塵雜家有賜書辭賦清
新屬言玄遠室邇人曠物疎道親養素丘園台階虛位
庠序公朝萬夫傾望豈徒苟令可想李公不亡而已哉

前晉安郡侯官令東海王僧孺年三十五理尚棲約思
致恬敏既筆耕為養亦傭書成學至乃集螢映雪編蒲
緝柳先言往行人物雅俗甘泉遺儀南宮故事畫地成
圖抵掌可述豈直鼯鼠有必對之辯竹書無落簡之謬
踈坐鎮雅俗弘益已多僧孺訪對不休質疑斯在並東
序之祕寶瑚璉之茂器誠言以人廢而才實世資臨表
悚戰猶懼未允不任下情

桓溫薦譙元彥表

臣聞大朴既虧則高尚之標顯道

喪時昏則忠貞之義彰故有洗耳投淵以振玄邈之風
亦有秉心矯跡以敦在三之節是故上代之君莫不崇
重斯軌所以敦俗訓民靜一流競伏惟大晉應符御世
運無常通時有屯蹇神州邱墟三方圮裂兔置絕響於
中林白駒無聞於空谷有識之所悼心大雅之所歎息
者也陛下聖德嗣興方恢天緒臣昔奉役有事西土鯨
鯢旣懸思宣大化訪諸故老搜揚潛逸庶武羅於昇沉
之墟想玉燭於亡齊之境竊聞巴西譙秀植操貞固抱

德肥遜揚清渭波于時皇極邁道消之會羣黎蹈顛沛
之艱中華有顧瞻之哀幽谷無遷喬之望凶命屢招奸
威相逼身寄虎吻危同朝露而能抗節玉立誓不降辱
杜門絕跡不面偽庭進免龔勝亡身之禍退無薛方詭
對之譏雖園綺之棲商洛管寧之默遼海方之於秀殆
無以過于今西土以為美談夫旌德禮賢化道之所先
崇表殊節聖詰之上務方今六合未康豺豕當路遺黎
偷薄義聲弗聞益宜振起道義之徒以敦流遜之敝若

秀蒙蒲帛之徵足以鎮靜頽風軌訓囂俗幽遐仰流九服知化矣

杜密去官還家每謁守令多所陳託同郡劉勝亦自蜀郡告歸鄉里閉門掃軌無所干及太守王昱謂密曰劉季陵清高士公卿多舉之者密知昱激已對曰劉勝位為大夫見禮上賓而知善不薦聞惡無言隱情惜已自同寒蟬此罪人也今志義力行之賢而密達之違道失節之士而密糾之使明府賞刑得中令問休揚不亦萬

分之一乎。昱慚服待之彌厚。

唐高宗屢責侍臣不進賢。李安期對之曰：「邑十室，且有忠信，天下至廣，不為無賢。比來公卿有所薦引，皆劾為朋黨，滯淹者未獲伸，而在位者先獲罪，是以各務杜口耳。陛下果推至誠以待之，其誰不願舉所知邪？」上深以為然。

武太后命宰相各舉尚書郎一人。仁傑舉其子光嗣，拜地官員外郎。已而稱職，太后喜曰：「卿足繼祁奚矣。」通事

舍人元行沖博學多通仁傑重之行沖數規諫仁傑且曰凡為家者必有儲蓄脯醢以適口參朮以攻疾僕竊計明公之門珍味多矣行沖請備藥物之末仁傑笑曰吾藥籠中物何可一日無也

武太后嘗問仁傑朕欲得一佳士用之誰可者仁傑曰未審陛下欲何所用之太后曰欲用為將相仁傑對曰文學蘊藉則蘇味道李嶠固其選矣必欲取卓犖奇才則有荊州長史張柬之其人雖老宰相才也太后擢東

之為洛州司馬數日又問仁傑對曰前薦東之尚未用也太后曰已遷矣對曰臣所薦者可為宰相非司馬也乃遷秋官侍郎久之卒用為相仁傑又嘗薦夏官侍郎姚元宗監察御史曲阿桓彥範太州刺史敬暉等數十人率為名臣或謂仁傑曰天下桃李悉在公門矣仁傑曰薦賢為國非為私也

陸贄請令臺省長官各舉其屬著其名於詔書異日考其殿最并以升黜舉者未幾或言於德宗曰諸司所舉

皆有情故或受貨賂不得實才德宗密諭贄自今除改
卿宜自擇勿任諸司贄上奏其畧曰宣行以來纔舉十
數議其資望旣不愧於班行者其行能又未聞於闕敗
而議者遽以騰口上煩聖聰請使所言之人指陳其狀
某人受賄某舉有情付之有司覈其虛實謬舉者必行
其罰誣善者亦反其辜何必貸其姦賊不加辨詰私其
公議不出主名使無辜見疑有罪獲縱枉直同貫人何
賴焉 今之宰相則往日臺省長官今之臺省長官乃

將來之宰相但是職名暫異固非行舉頓殊豈有為長官之時則不能舉一二屬吏居宰臣之位則可擇千百具僚物議悠悠其惑斯甚蓋尊者領其要卑者任其詳是以人主擇輔臣輔臣擇庶長庶長擇佐僚將務得人無易於此則天舉用之法傷易而得人陛下慎簡之規太精而失士德宗竟追前詔不行

張循憲為河東采訪使有疑事不能決病之問侍吏曰此有佳客可與議事者乎吏言前平鄉尉張嘉貞有異

才循憲召見詢以事嘉貞為條析理分莫不洗然循憲因請為奏皆意所未及循憲還見太后太后善其奏循憲具言嘉貞所為具請以已之官授之太后曰朕寧無一官自進賢邪因召嘉貞入見內殿與語大悅即拜監察御史擢循憲司勳郎中賞其得人也